

Taarsigassarsisitsisarfinnut aningaasaliisarnermillu ingerlatsivinnut aningaasaateqarnissamut piunasaqaatit nakkutilliinermullu piunasaqaatit pillugit Kalaallit Nunaanni inatsisip allangortinneqarnissaanut siunnersuut ((EU) peqqussut nr. 575/2013 taarsigassarsisitsisarfinnut aningaasaliisarnermillu ingerlatsivinnut nakkutilliinermik piunasaqaatit) kiisalu aningaasalersuisarnermik ingerlatsineq pillugu inatsisini assigiinngitsuni aalajangersakkat Kalaallit Nunaannut atuutilersinneqarnissaanik peqqussummut ilaalernissamut siunnersuut kiisalu aningaasalersuisarnermi suliffiit ilaasa allatut ilusilersornissaat atorunnaarsinnissaallu pillugu inatsisip allangortinneqarneranut inatsisit assigiinngitsut aamma aningaasaqarnermi patajaassuseq pillugu inatsisip atorunnaarsinneqarnera pillugu inatsisip Kalaallit Nunaannut atuutilersinneqarnerat pillugit peqqussummut Namminersorlutik Oqartussat ilanngunnissaat pillugu Inatsisartunut aalajangiiffigisassatut siunnersuut
(Aningaasaqarnermut Naligiissitaanermullu Naalakkersuisoq)

Saqqummiussissut

(Aningaasaqarnermut Naligiissitaanermullu Naalakkersuisoq)

Siullermeerneqarnera

Aningaasaqarnermut suliaasaqarfimmi Danmarkip aamma Kalaallit Nunaata inatsisiliorneri nunat assigiinngitsut akornanni malittarisassiornermi, tamatumani pingaarnermik EU-p inatsisaanni, annermik tunngaveqarput.

Inatsisissatut siunnersuummi saqqummiunneqartumi aamma peqqussutit marluk ilanngunneqartuni siunertaavoq, Kalaallit Nunaanni aningaasaliisarnermi ingerlatsivinnut malittarisassat Danmarkimi aamma EU-mi malittarisassanut assingunissaasa qulakkeerneqarnissaa.

Kalaallit Nunaat EU-mut ilaasortaanginnera pissutigalugu, EU-p peqqussutai Kalaallit Nunaannut toqqaannartumik atuuffeqanngillat. Inatsisissatulli siunnersuutit saqqummiunneqartup aamma peqqussutit marluk ilanngunneqartut, EU-p malitassiai aamma peqqussutai toqarneqartut ilaasa Kalaallit Nunaannut atuunnissaat qulakkeerneqassaaq. EU-p allannguinnissamut peqqussutai pingasut inatsisissatut siunnersuummut ilanngunneqarput, tamatumani iluqqaanermi inatsisissatut allannguutit pingaarnerit allaaserineqarlutik.

Allannguutini aningaasaliisarnermi ingerlatsiviit patajaannerunerisa aamma aningaasaqarnermi patajaassutsip, taamaasiornikkullu taarsigassarsisitsisarnermut, ineriartornermut kiisalu suliffeqarnermut malittarisassat pitsanngorsarneqarnissaat siunertaavoq.

Kalaallit Nunaanni aningaasaliisarnermi ingerlatsiviit aningaasaliissutiniq aamma aningaasanik tigoriaannarnik pissarsinissamut periarfissaqarnerulissapput. Tamatuma saniatigut malittarisassat siunnersuutigineqartut naalagaaffeqatigiinnerup iluani niueqatigiinneq ikorfartussavaa aamma Kalaallit Nunaata aningaasalersuisarnermi immikkoortuata nunat assigiinngitsut akornanni kiffartuussisarnissaa qulakkeerlugu.

Danmarkimi Aningaaserivinnik Nakkutilliisoqarfiup, nakkutilliisusnaanini tunngavigalugu, Kalaallit Nunaanni aningaasaliisarnermi ingerlatsiviit il.il. aningaasaqarnermut inatsit malinnerai nakkutigisarpai. Manna inatsisissatut siunnersuummi aamma peqqussutini tamatuminnga allannguisoqanngilaq.

Taamatut oqaaseqarlunga siunnersuut Inatsisartunut suliassanngortippara.